



# L'ALCORAN DE MAHOMET.

---

*LE CHAPITRE DE LA PREFACE  
escrit à la Meque, contenant sept versets.*



V Nom de Dieu clement & misericordieux, louïange soit à Dieu clement & misericordieux, Roy du iour du Jugement, c'est toy que nous adorons, c'est à toy que nous demandons secours, conduits nous au droict chemin; au chemia de ceux que tu as gratifiez, contre lesquels

tu n'as pas esté courroucé, & nous ne serons pas deuoyez.

## LE CHAPITRE DE LA VACHE

*escriit à la Meque contenant deux cens quatre vingts sept versets.*

*Voy la  
Grèmaire  
D'Erpo-  
sium.*

**A**V Nom de Dieu clement & misericordieux. Je suis Dieu tres - sage. Il ny a point de doute en celiure, il conduit au droict chemin les gens de bien qui croyent ce qu'ils ne voyent pas, qui font leurs prieres avec affection, & depensent en aumosnes vne partie des biens que nous leur auons donnez. Ceux qui croyent aux choses qui t'ont esté inspirées, en celles qui ont esté preschées auparauant toy, & à la fin du monde, ne sont pas ignorans, ils sont conduis par leur Seigneur, & feront bien heureux. Malheure est sur les infidelles, soit que tu les reprenne, ou que tu ne les reprenne pas, ils ne se conuertiront pas, Dieu leur à fermé le cœur, les oreilles & les yeux, & ressentiront de tres-grands tourmens. Plusieurs personnes disent, Nous croyons en Dieu & au iour du Jugement, & n'y croyent pas, ils pensent tromper Dieu & ceux qui croyent en Dieu, certainement ils se trompent eux mesmes, & ne le cognoissent pas, Dieu augmente-

*Voy l'ex-  
plication  
de Gelat-  
din.*